

XDP

1918-yil
21-iyundan chiqqa
boshlagan

№ 14, 2024-yil
3-aprel,
chorshanba (32.812)

O'zbekiston OVOZI

Ijtimoiy-siyosiy gazeta

Birgalikda ijtimoiy davlat sari!

Меҳнат миграцияси жараёнларини такомиллаштириш чоралари кўриб чиқилди

Президент Шавкат Мирзиёевга миграцияни тартибга солиш ва меҳнат мигрантларини қўллаб-қувватлашга қаратилган таклифлар тақдимот қилинди.

Бутун дунёда ишчи кучи кўчиб юриши табиий жараён. Мамлакатимизда бундай фуқароларни чет элга тартибли ва хавфсиз жўнатиш бўйича муайян ишлар қилинмоқда. Охириги икки йилда Ташқи меҳнат миграцияси агентлиги томонидан 70 минг киши ривожланган давлатларга юборилган.

Лекин айрим одамлар малака талаб қилмайдиган ўлкаларга ўзлари ҳам мустақил равишда кетаяпти. Уларнинг меҳнат ва яшаш шароитлари, касби, даромади турлича.

Давлатимиз раҳбари соҳада фуқароларга қулайликлар яратиш, меҳнат миграциясидан қайтган шахсларнинг бандлигини таъминлаш вазифаларини қўйган эди. Шу боис меҳнат миграцияси тизимини такомиллаштириш бўйича таклифлар ишлаб чиқилди.

Унга кўра, Бандлик вазирлиги ҳузуридаги Ташқи меҳнат миграцияси агентлиги давлат муассасаси шаклида бошқарув органига айланди. Агентлик директори бир вақтнинг ўзида Бандлик вазири ўринбосари бўлади. У меҳнат мигрантларини қўллаб-қувватлаш жамғармасини ҳам бошқаради.

Буюк Британия, Германия, Польша, Венгрия, Япониядаги элчихона ва консулликларда меҳнат миграцияси бўйича атташе, Саудия Арабистонида агентлик вакили лавозими жорий қилинади. Хориждаги фуқароларимиз масалаларини тезкорлик билан ҳал қилиш учун элчихоналар ва тегишли вазирликларда 24 соат ишлайдиган "колл-марказлар" ташкил этилади.

"Хорижга иш - маҳалладан" тамойили йўлга қўйилади. Бунда, ҳоким ёрдамчиси, ёшлар етакчиси хорижда ишлаш истагида бўлган фуқарони аниқлаб, "Онлайн маҳалла" платформасига киритади. Номзодлар хориждаги иш берувчилар танловларига жалб қилинади.

Касбий малакаси йўқ ва тили билмайдиган фуқароларни касбга ўқитиш ва профтаълим муассасаларида мақсадли тайёрлаш йўлга қўйилади. Бунинг учун Ташқи меҳнат миграцияси агентлиги ҳузурида фуқароларни хорижий тилларга ўргатиш ва ишлашга мақсадли тайёрлаш маркази очилади.

Хорижда ишлаш истагида бўлганлар муайян харажатларга ҳам дуч келади. Шу боис энди мигрантларнинг ишчи виза, йўл чиптаси, хорижий тил ва касб бўйича малакани баҳолашти харажатлари қисман қопланади. Чет тили бўйича халқаро ёки унга тенглаштирилган сертификат олган фуқарога тил ўрганиш учун сарфланган харажатнинг 50 фоизи қоплаб берилади.

Меҳнат миграциясидан қайтган фуқароларнинг бандлигига кўмаклашиш ҳам муҳим масала. Шу боис, Сайхунобод тажрибаси асосида уларга томорқада маҳсулот етиштириб, даромад олиши учун молиявий кўмак берилади ҳамда бошқа турдаги бандлик хизматлари кўрсатилади. "Кичик бизнесни узлуксиз қўллаб-қувватлаш" комплекс дастурига мувофиқ имтиёзли кредитлар ажратилади. Тиббий муассасалар миграциядан қайтган шахслар ва уларнинг оила аъзоларини беғул тиббий кўриқдан ўтказди. "Инсон" марказлари томонидан ота-онаси хорижда меҳнат қилаётган болаларга ижтимоий ёрдам кўрсатилади.

Меҳнат миграциясидан қайтганларни ишга олган корхонага ҳар бир ходим учун бир йил давомида Бандликка кўмаклашиш жамғармасидан ойига 500 минг сўм субсидия берилади. Ушбу тадбирларга бу йил учун барча манбадан 100 миллиард сўм ажратилади.

Давлатимиз раҳбари бу тизимни самарали йўлга қўйиб, фуқароларга сифатли хизмат кўрсатиш, бандликни ошириш бўйича кўрсатмалар берди.

president.uz

ELEKTORAT MANFAATI



ТАДБИРКОР, ИШ БЕРУВЧИ ҚАНЧАЛИК МАСЪУЛИЯТЛИ?

ЖАРИМА МИҚДОРИ КАМАЙТИРИЛАДИ


Олий Мажлис Қонунчилик палатасининг навбатдаги мажлисида "Ўзбекистон Республикаси Солиқ кодексининг 227-1-моддасига ўзгартириш киритиш тўғрисида"ги қонун лойиҳаси биринчи ўқишда муҳокама қилинди.

Янги таҳрирдаги Конституциямизда жазолар мутаносиблиги принципи акс эттирилиши муносабати билан солиқ қонунчилигини бузиш билан боғлиқ жавобгарликларни янада либераллаштириш зарурати юзага келганлиги сабабли қонун лойиҳаси билан Солиқ кодексининг 227-1-моддаси бўйича жарима миқдори 50 бараварга камайтирилмоқда. Яъни, эндиликда фискал белгиларни акс эттириш ёхуд автоматлаштирилган ҳисобга олиш ўлчов воситалари билан жиҳозлаш ёки солиқ органларининг ахборот тизимлари билан интеграция қилинишини таъминлаш бўйича қонунчиликда белгиланган талабларни ёки тартибни бузиш, шунингдек, товарларни (маҳсулотларни) ишлаб чиқарувчилар, импорт қилувчилар ва сотувчилар томонидан идентификация воситалари орқали мажбурий рақамли маркировка тартиб-қоидаларига оид ҳуқуқбузарликлар биринчи марта содир этилганда реализация амалга оширилган охириги ҳисобот чорагида олинган соф тушумнинг икки фоизи миқдорида жарима солишга сабаб бўлиши белгиланмоқда.

Худди шундай ҳуқуқбузарлик молиявий жазо чораси қўлланилганидан кейин бир йил давомида такрор содир этилган бўлса, реализация амалга оширилган охириги ҳисобот чорагида олинган соф тушумнинг 20 фоизи миқдорида жарима солишга сабаб бўлади.

Муҳокамалар давомида депутатлар қонун лойиҳасининг қабул қилиниши солиқ қонунчилигини бузганлик учун жавобгарликни янада либераллаштириш, солиққа оид ҳуқуқбузарликлар учун жавобгарлик чораларини адолатлилик тамойили асосида белгилаш, ҳуқуқбузарликларнинг барвақт олдини олиш ҳамда тадбиркорлик субъектларига ортиқча харажатлар юкланмаслигига хизмат қилишини таъкидладилар.

DASTUR VA AMAL: 9-QADAM



ТАРАҚҚИЁТ ТАЪЛИМДАН СУВ ИЧАДИ

3 САҲИФАДА

Тошкент-Мумбай-Тошкент

2 апрель куни "Uzbekistan Airways" миллий авиакомпанияси томонидан Тошкент ва Ҳиндистоннинг Мумбай шаҳри ўртасидаги ҳаво қатнови йўлга қўйилди.

Энди мазкур йўлнинг йирик мегаполиси ўртасида "Airbus A320 Neo" ҳаво лайнерларида ҳафтасига икки марта парвозлар амалга оширилади.

Таъкидлаш жоизки, Ўзбекистоннинг Деҳлидаги элчихонаси томонидан мамлакатимизнинг туризм салоҳиятини Ҳиндистоннинг йирик шаҳарларида кенг тарғиб қилиш бўйича изчил чоралар кўрилмақда. Ушбу йўналишда амалга оширилаётган тизимли ишлар натижасида Ўзбекистон ва Ҳиндистон ўртасида туристик оқим изчил фаоллашмоқда.

"Дунё" АА.



